



Synfocity = 416

15th November, 2012

mail us at : mzsynfo@gmail.com; mizoramsynod@gmail.com - Phone - 2314648

□ SEC 240-na

November 13 (Thawhlehi) atang khan Synod Executive Committee (SEC) chu a vawi 240-na atan a thu a, member 128 an tel a ni. Meeting hi Rev. Thangzauva, Synod Moderator-in a kaihrui a, Synod Secretary Reports leh Sum lam reports te ngaihthlak a ni.

Tun tum SEC hian thu ngaihtuah tur 75 zet an nei a, chung zingah chuan Kohhran Hmeichhe inkaihruaina enthat te, thawktu tharte tana pension dan thar siam te, Ramthar Manual enthat te, Chhim lama kohhran mite humhalh leh chhawmdawl chungchang te, Bawngkawna Synod ram hman dan tur Plan leh Project leh Bawngkawna ram lei belh thu te, Myanmar nena thawhhona chungchang te, Bangalore Mizo Presbyterian Kohhran kal zel dan tur te, India ram khawpui liana Pastor dah chungchang te, Synod Office hour chungchang te, Interserve India-in Rev. Zaidarhauva an dilna te, Manipur Area Synod-a hlan kai thu te, Seniority tehna siam chungchang leh Field worker te hlawh tihpun thu te leh Manipur Presbyterian Church hming pua la dingte enkawl zel dan tur te chu a langsar zual an ni a, Board hrang hrang atanga thu lut inrelbawlna lam khawih thil thahnem tak ngaihtuah mek a ni baw.

Tun tum SEC-ah hian hotu term tawp inthlan thar tur a awm nual a, chungte chu- Synod Executive Secretary pathumte, Synod Hospital Director, PRESCOM General Manager, Synod Higher Secondary School Principal leh Synod Office Superintendent te an ni.

Synod Secretary-in kumin chhunga Synod chet velna langsar zual leh thil tawn hrang hrangte a report a, chung zingah chuan July 21-a Champhai Night Bus chesuala thi mi 14 chhungte Rs.10,000/- theuhva ral an nih thu leh hliam tuar mi 10-te Rs.3,000/- theuhva kan an nih thu te; Bung Bungalow bula Taxi lei minin a hnawla thi mi pahnihte Rs.10,000/- ve vea ral an nih thu leh hliam tuar mi pahnihte Rs.3,000/- ve vea kan an nih thu te, October 6-a Kawnpui Hmar Venga Truck-in chhungkuaa a sut hlum vek Pu Laldawngliana leh a nupui fanate mi pathum an hming kima Rs.10,000/- theuhva ral an nih thu te, Nagaland Baptist Church Council hotuten Mizorama inthlanna boruak muanawm tak a awm thin dan zir chiang tura an palai rawn tirhte leh Synod Officers Meeting te September 6-a an inkawm thu te, Assam leh Mizoram ramri buai chungchanga Synod Officers Meeting-in Chief Minister an hmuh thu leh lehkha an theh luh thu te, Chhim Biala Hospital din tuma hma lak mekna chu chak taka kalpui zel niin April 2013 chhunga hawn hman beisei a nih thu leh Synod rawngbawlna peng hrang hranga hmasawna leh changtlunna thar lawmawm tak takte chu a langsar zual an ni.

Synod sum dinmun tarlan a ni a, kum 2012-2013 Pastoral Budget Rs. 56,28,35,000/- (cheng nuai sangnga zaruk sawmhni pariat singthum leh sangnga)-ah za zela 57.96 hmuh tawh a ni a, Mission Budget Rs. 37,27,65,000/- (Cheng nuai sangthum zasarih sawmhni pasarih singruk leh sangnga)-ah za zela 69.64 hmuh tawh a ni. Pastoral leh Mission Budget belhkhawm chu Rs. 93,56,00,000/- (Cheng nuai sangkua zathum sawmnga paruk) a ni a, October 2012 thleng khan za zela 62.62 zet hmuh tawh a ni.

Chanchin buatsaih lai thlenga thurel hriat theih chinah Executive Secretary atan Rev. Vanlalzuata, Rev. Lalzuithanga leh Rev. P.C. Pachhunga te thlan an ni a, Executive Secretary-te hna chanpual tur hi SEC vekin a siam leh tur a ni. Administrative Secretary pathum heng hmun atan te hian thlan an ni baw.

Chhiam Bial : Rev. F. Lalrinnunga
Barak Area : Rev. Z.D. Lalhmachhuana
Manipur Area : Rev. R. Lalbiaknia

Hospital Director thar atan Dr. Vanlalruata thlan a ni a, PRESCOM General Manager, Synod Higher Secondary School Principal leh Synod Office Superintendent turte thlanna buatsaih leh mek a ni. Hotu thlan tharte hi Synod Inkhawmpuiin a pawm turin chhawp chhuah a ni ang.

Synod Executive Committee hi Synod Calendar duan lawkah chuan ni thum chhung (Nov. 13 -15) awh tura tih a ni a. Tun tumah hian thu rel tur a thathnem deuh avangin November 16 (Zirtawpni) thleng pawhse a ni.

□ Synod Bookroom thar hawng

November 9 (Zirtawpni) khan Synod Moderator Rev. Thangzauva chuan Serchhip Branch Synod Bookroom building thar a hawng.

Serchhip Branch Synod Bookroom building thar hi Serchhip AOC Venga Synod rama sak a ni a, building sakna atan hian Mizoram Synod chuan Rs. 17,20,000/- a ruahman a, April 18, 2012 atang khan bul tan nghal a ni a, Rs. 16,28,895/- sen ral a a ni. A building dunglam hi ft. 36, a vang lam ft. 24 a ni a, thla 7 chhungin sak zawh a ni. Synod Bookroom building thar hawngtu Synod Moderator Rev. Thangzauva chuan, khawvel thang zelah Information technology thiamna chu sang chho zel mah se, ziaka lehkha dah chhiar theih chhiar theih chu a hlutna a nep chuang lo a ni, a ti a. Synod Bookroom-a thil zawrhte chu mipuite tan pawh a him tih sawiin, hei avang hian mipuite pawhin pan thin se a duh thu a sawi baw.

Upa Lalhmangaiha Sailo, Account in charge-in technical report a pe a, thusawitu dang Upa F. Lalsangliana, PresCom General Manager chuan, kum 1911-ah Synod Press din a nih thu a sawi a, hemi rual hian Synod Bookroom pawh hawn nghal a nih bakah vawiin thlenga chanchinbu la chhuak, Kristian Tlangau pawh tihchhuah nghal a ni, a ti.

A hawngna inkhawmah hian Serchhip Pastor Bial Zaipawlin hla an rem a, Kohhran mite leh thuthar lakhawmtute pawhin an tawiawm tha hle a ni. Synod Bookroom, Serchhip Branch hi kum 1991, March ni 5-ah din tan a ni a, kum 21 chhung zet mi in luah hawhin an awm hnuah building thar an nei thei ta a ni.

□ Moderator-in Serchhip Bazar Veng Biak In thar a hawng

November 10 (Inrinni) khan Synod Moderator Rev. Thangzauva'n Serchhip Bazar Veng Presbyterian Kohhran Biak In thar a hawng.

Moderator-in Biak In thar a hawn zawh hian Pathian biak inkhawm neih chhunzawm a ni a, Bial vawngtu Pastor C. Lalduhawman inkhawm a kaihrui a, Rev. Thangzauva, Synod Moderator-in thuchah a sawi a, Kohhran Zaipawl leh Bial Zaipawl te an zai baw. Chawhnu lamah inpawlkhawm programme hman zui a ni a, tlai lamah Biak In thar lawmna ruai kilho a ni.

Serchhip Bazar Veng Biak In hmun hi Synod-in cheng nuai 5-a a leisak a ni a, duhthusam a tlin tawk loh deuh avangin a ram thenawma mi Pi Lalzawngi ram 7ft-a zau chu cheng nuai 3-in lei belh a ni. Biak In hi ni 456 chhungin an sa zo va, Biak In sakna atana sum sen zawng zawng hi cheng nuai 51 vel a ni.

Biak In hi a chhung thlak dung lam 56ft leh a chanvea sei, a vang lam 41ft leh a chanvea zau a ni a, Biak In hnung Vestry atanga a luhka bathlar huam chin thlengin a pawn lamah a dung sei zawng hi 80ft a ni a, a building hi chhawng 5 a ni. Biak In thar lawmna programme hi Pathianni zan thlengin hman a ni a, Synod Moderator hian Pathianni hian Bial chhung Kohhran hrang hrangah hun a hmang kual a ni.

☐ **Missionary interview result a chhuak**

Synod Mission Board-in Contract Missionary a lak tharte result chu November 12 (Thawhtanni) tlai dar 3:00 khan tih chhuah a ni a. Diltu 324 atangin mi 101 lak niin mi 24-te chu waiting list-ah dah an ni. Waiting list hi Synod Mission Board-in advertisement a tih chhuah leh hma chu a nung ang.

Missionary tharte hi hna hrang hrang atan hetiang hian lak an ni- Nurse leh Healthworker atan mi pariat (8) lak an ni a, an vai hian hmeichhia vek an ni. Craft Teacher atan mi pathum (3) lak an ni a, an vai hian hmeichhia vek an ni. Evangelist Teacher atan mi sawmthum pariat (38) lak an ni a, an zinga mi sawmpahnih (12) chu mipa niin hnam dang pakhat a tel. Evangelist atan mi sawmnga pahnih (52) lak an ni a, an zinga mi sawmhni leh pahnih (22) te chu mipa an ni a, Evangelist zingah hian hnam dang pakhat a tel bawk. Heng missionary lak thar 101 zingah hian mipa 32 an awm a, a bak zawng 69 chu hmeichhia an ni.

Heng thawktu lak tharte thawhna hmun tur hi siam fel mek a ni a, an posting tur hi December 12, 2012-ah tihfel a ni ang a, hemi ni hian Synod Mission Board Office-ah inlan vek tur a ni ang.

☐ **Synod Worship Seminar**

November 16 (Zirtawpni) hian Kolasib Venglai Kohhran Hall-ah Worship Seminar neih a ni dawn a, seminar-a tel tur hian Pastor, Pro. Pastor, Kohhran tin aiawh leh Bial KTP aiawh te sawm an ni a, Aizawl lam atangin Rev. R. Lalengkima, Rev. C. Rosiama, Revd. Chuauthuama leh Upa Lalramthanga, Worship Committee Member-te an kal bawk ang.

Chawhma hunah Rev. R. Lalengkiman programme a kaihruai ang a, Revd. Chuauthuaman 'Presbyterian Pathian Biak Kalphung' tih thupui a sawi ang a, sawihona hun hman a ni ang. Chawhnu programme chu Upa Lalramthangan a kaihruai ang a, Rev. C. Rosiaman 'Pathian Biak Inkhawm Hruaina Bu Hman Dan' tih thupui a sawi ang a, sawihona hun hman a ni leh ang.

☐ **Zin**

◆ November 14 - 16 hian Chawngte-ah Office thil tul buaipuin Upa H. Ngurkhuma, Mission Promoter leh Pu Vanlalchhuanga, Supervisor of Schools te an zin mek.

◆ November 13 - 16 chhung hian Chhingchhip Bial huapin CHhingchhip Kohhranah Khuang vuak leh Hla hruai training neih mek a ni a, training hi Pu Lalromawia, Synod Music Instructor leh Upa Thanghuta, Dam Veng ten an neihpui a ni.

☐ **Synod Literature & Publication Board**

November 16 - 18 hian Chhiahtlang Bial huapin Chhiahtlang Kohhranah Literature Seminar neih a ni dawn a, seminar neihpui tur hian Rev. K. Lalpiangthara, SL&PB Editor; Upa H. Ronghaka, SL&PB Jt. Editor leh NI. Lalmuanzuali, Soloist te an kal ang.

☐ **Kristian Thalai Pawl**

◆ November 17 & 18 hian Salem Boarding School-ah Synod Choir-ten Retreat leh Praise & Worship an hmanpui dawn a, Synod Choir Director Pu Vanlalhrui leh T. Upa Lalhrui, CKTP Committee Member ten an tawiawm ang.

☐ **Synod Hospital**

November 21 - 24 hian Synod Hospital-ah Urology Camp neih a ni dawn a, Super Specialist Dr. K.P. Mishra, M.S., M.Ch., (Urologist) a lo kal dawn a ni. November 21 & 22 hi inentir hun a ni ang a, November 23 & 24 ah zai ngai te a zai ang. Kala lungte awm, zai hawng lovin chhut keh/key-hole-surgery(PCNL) tih theih a ni bawk ang.

☐ **Hruaina Eng FM Radio & TV Programme**

◆ **NOVEMBER 16 (FM Radio @ 7:30 p.m.) :**

Choir: Bawngkawn Bial Zaipawl - Aw Bethlehem, Mizoram Synod Choir - Hriatchian Lehzual Che Ka Duh, **Thuchah** : Rev. C. Lianhmingthanga - Pathian Lehkhabu Tangkaina, **Duet** : Malsawmtluanga & Lalremruata - Bul Tan Min Phalsak, **Solo** : H. Lalmuankimi - Aw Zan Thianglim

◆ **NOVEMBER 18 (TV Programme @ 3:00 p.m. :**

Choir : Mizoram Synod Choir - Lalpa Thatzia, **Sermon** : P.C. Vanlalnglaki - Ram chu Lalpa ta a ni, **Solo** : Lalruotmawi - Kan ngai che Thlarau Thianglim, Synod Bookroom, Serchhip Branch Hawna, **Short Play** : Chaltlang KTP @ KTP General Conference, 2012

☐ **Susamachar Prasaran Programme**

NOVEMBER 18 (Pathianni) 5:00 pm. Hindi Gospel Programme (Susamachar Prasaran) :

Group/Choir/Solo : Bungkawn Masihi Sangati - Ji Uthe, Group/Choir/Solo : Luangmual Vengthlang - Papi roope, **Sermon** : Rev David Lalramliana Ralte - He mere Prabhu, He mere Parmeshwar, Group/Choir/Solo : Govt Complex Kohhran - Anugrah Karii, Group/Choir/Solo : Tuikual Pastor Bial - Prabhu Mere

☐ **Moderator Programme**

Synod Moderator Rev. Thangzauva chuan hetiang hian kar tawpah hun a hmang ang :

November 17 (Inrinni)	Zan	-	Tiangnuam Vengthar Kohhran
November 18 (Pathianni)	Chawhma	-	Central Jail (chung)
November 18 (Pathianni)	Chawhnu	-	Rangvumual Kohhran
November 18 (Pathianni)	Zan	-	Electric Kohhran

